

**PRU13 Di Johor Panas Dengan Pertembungan Tokoh Pemimpin Parti
Bernama
16 April, 2013**

JOHOR BA HARU, 16 April (Bernama) -- Johor yang merupakan kubu kuat Barisan Nasional (BN) mencuri tumpuan ramai pada Pilihan Raya Umum ke-13 (PRU13) kali ini berikutan tumpuan pembangkang yang cuba melakukan tsunami politik di negeri ini.

Tumpuan utama ialah kerusi Parlimen Gelang Patah yang bakal menyaksikan dua pemimpin kategori "heavyweight" berentap - Menteri Besar Johor Datuk Abdul Ghani Othman dan veteran DAP Lim Kit Siang - penyandang Parlimen Ipoh Timur.

Kit Siang yang sememangnya dikenali sebagai seorang pemimpin cauvanisme, dilihat cuba mengambil kesempatan ke atas majoriti lebih 52 peratus pengundi Cina di kawasan itu untuk bersimpati dengan DAP dalam merealisasikan hasratnya untuk memulakan tsunami politik di Johor.

Pemimpin DAP yang juga dikenali sebagai pemimpin "touch "N go" itu kerana gemar berhijrah kawasan setiap kali pilihan raya, dilihat hanya bermodalkan janji dan menghentam kerajaan untuk meraih sokongan.

Sedangkan Abdul Ghani yang juga penyandang DUN Serom, memang telah terbukti mempunyai kewibawaan sebagai menteri besar selama empat penggal sejak tahun 1999.

Banyak projek pembangunan di Johor telah dijalankan hasil inisiatifnya, termasuk projek Iskandar Malaysia, projek minyak dan gas di Pengerang, selain pembangunan di pusat pentadbiran kerajaan negeri di Nusajaya.

Seharusnya pengundi di Gelang Patah menjadikannya sebagai kayu pengukur untuk menilai dan memilih pemimpin yang layak mewakili mereka kelak.

Kawasan Parlimen Segamat yang disandang oleh Timbalan Presiden MIC, yang juga Menteri Sumber Manusia Datuk Dr S Subramaniam, turut menjadi tumpuan.

Pembangkang meletakkan Pengerusi PKR negeri Dr Chua Jui Meng, yang sebelum ini heboh dikatakan patah hati dan membawa diri hampir sebulan, berikutan kawasan Gelang Patah idamannya diambil oleh Kit Siang.

Di Parlimen Pulau pula bakal menyaksikan Pengerusi UDA Holdings Bhd Datuk Nur Jazlan Mohamed, penyandang kawasan itu menentang Naib Presiden PAS Salahuddin Ayub, yang sebelum ini bertanding di Kubang Kerian, Kelantan.

Keputusan bertanding di kawasan itu dilihat ibarat menjerut diri sendiri memandangkan Nur Jazlan cukup disenangi oleh pengundi di kawasan itu, termasuk pengundi Cina, berikutan beliau kerap turun padang dan prihatin terhadap nasib pengundinya.

Pulau mempunyai 100,695 pengundi, dengan 47 peratus terdiri daripada pengundi Melayu, 44.7 peratus Cina, 10 peratus India, dan satu peratus lain-lain kaum.

Pada pilihan raya umum lepas, Nur Jazlan memperoleh 20,449 majoriti undi, menewaskan calon PAS, satu angka yang patut diberi perhatian oleh Salahuddin.

Satu lagi kawasan panas yang menarik tumpuan ialah Kluang, yang bakal menyaksikan bekas pensyarah Universiti Malaya yang juga Timbalan Menteri Pengajian Tinggi, Datuk Dr Hou Kok Chung, mempertahankan kerusi itu.

Kawasan parlimen tersebut turut diintai calon payung terjun DAP, Liew Chin Tong yang berhijrah dari Pulau Pinang.

-- BERNAMA

Copyright © 2013 BERNAMA

Source: <http://www.bernama.com/bernama/v7/bm/newsindex.php?id=942612>